

«Vistas per il futur plitost turbblas»

Parlament ha tractà quint statal 2013

■ (anr/fa) **Suenter nov onns cun rendaments positivs ha già il Grischun l'onn 2013 in resultat total cun in deficit da 34 milliuns francs. La cussegliera guvernativa Janom Steiner ha numnà las vistas per il futur.** Il quint annual dal chantun Grischun è vegnì fatg per l'emprima giada tenor il nov dretg da finanzas. Il quint economic ha da nov trais stgalims: Sin l'emprim stgalim mussa'l il success operativ, sin il segund extraordinari e sin il terz il success total che transfurma l'agen chapital. Sin l'emprim stgalim ha obtegnì il chantun in surpli da retgav da 40 milliuns francs, cumparegliabel cun il resultat da l'onn 2012 che importava 44 milliuns francs. Il departament da finanzas da cussegliera guvernativa *Barbara Janom Steiner* ha dentant già dad engrevgiar quest resultat cun rectificaziuns da la valor tar las investiziuns per in import total da 73 milliuns francs. Per exempel ha stuì vegnir reducida la valor da bilantscha da las aczias da la Repower per 102 milliuns francs a 245 milliuns francs pervi da la valor dal martgà ch'era la fin da l'onn pli bassa che l'onn precedent. Perquai è resultà l'onn passà in deficit da 34 milliuns francs.

Basa finanziaria tuttina anc solida

Ins na dastgia dentant betg survalitar quest resultat, ha ditg la cussegliera guvernativa Janom Steiner, «per gronda part è quel d'attribuir a la midada da sistem, cun 2,7 milliardas francs avain nus vinavant ina buna basa d'agen chapital e

praticamain nagins daivets.» Co ch'il quint 2014 vegn a sa preschentar è tenor ella grev da dir, «las perspectivas per il futur nun èn uschè cleras, en connex cun la quota da gudogn da la Banca nazionala, cun la golvaziun da finanzas tranter la confederaziun ed ils chantuns u cun ils retgavs da taglia pudessi dar era perditas considerablas ils proxims onns.» Betg calculablas per il chantun èn, sco ch'ella ha agiunt, las consequenzas finanzialas da las iniziativas sco p. ex. quella davart las secundas abitaziuns u davart la taglia pauschala. Che las aczias da Repower han pers valor ha da far, sco ch'ella ha ditg, «cun la politica d'energia en l'Unìun europeica. Las grondas subvenziuns da la fotovoltaica ed autra energia regenerabla surtut en Germania mettan sut squitsch nossa energia idraulica.» Il parlament ha approvà il quint statal 2013 cun 95:0 vuschs.



La ministra da finanzas Barbara Janom Steiner ha orientà davart las vistas futuras da las finanzas chantunalas. FOTO O. ITEM